

GABAY NG INDUSTRIYA PARA SA COVID-19: Mga Amusement Park at Mga Theme Park

Oktubre 20, 2020

Dinisenyo ang gabay na ito upang matugunan ang mga sektor at mga aktibidad na magbubukas sa buong estado. Gayunpaman, maaaring magpatupad ang mga lokal na opisyal ng kalusugan ng mas mahigpit na mga patakaran na iniayon sa mga lokal na kondisyong epidemiological, kaya dapat ding kumpirmahin ng mga employer ang mga nauugnay na lokal na patakaran sa pagbubukas.

PANGKALAHATANG-IDEYA

Noong Marso 19, 2020, naglabas ang Opisyal ng Pampublikong Kalusugan ng Estado at Direktor ng Departamento ng Pampublikong Kalusugan ng California ng utos na nag-aatas sa karamihan sa mga taga-California na manatili sa bahay upang pigilan ang pagkalat ng COVID-19 sa maraming tao.

Hindi pa ganap na alam ang epekto ng COVID-19 sa kalusugan ng mga taga-California. Ang mga naiulat na sakit ay puwedeng mula sa napakabanayad (ang ilang mga tao ay walang sintomas) hanggang sa malubhang sakit na maaaring magresulta sa pagkamatay. Ang ilang partikular na grupo, kabilang ang mga taong 65 taong gulang o pataas at ang may dati ng malulubhang medikal na kondisyon, tulad ng sakit sa puso o sakit sa baga o diabetes, ay may mas malaking pagkakataong ma-ospital at magkaroon ng malulubhang komplikasyon. Pinakamalaki ang posibilidad ng paghawa kapag ang mga tao ay may malapitang pakikipag-ugnayan o nasa lugar na hindi maayos ang bentilasyon na may kasamang nahawaan na tao, kahit na walang anumang sintomas o hindi pa nagkakaroon ng mga sintomas ang taong iyon.

Sa ngayon, walang tumpak na impormasyon tungkol sa bilang at mga antas ng COVID-19 ayon sa industriya o mga grupo ng trabaho, kabilang ang mga kritikal sa impastraktura na mga manggagawa. Nagkaroon ng maraming paglaganap sa iba't ibang lugar ng trabaho, na nagpapahiwatig na nasa panganib na makakuha o makapagpasa ng COVID-19 ang mga manggagawa. Kasama sa mga halimbawa ng mga lugar ng trabaho na ito ang mga ospital, pasilidad ng pangmatagalang pangangalaga, kulungan, produksyon ng pagkain, mga bodega, planta sa pagproseso ng karne, mga restaurant, at grocery store.

Habang nagbabago ang mga utos na manatili sa bahay, napakahalagang gawin ang lahat ng posibleng hakbang upang matiyak ang kaligtasan ng mga manggagawa at publiko.

Ang mga pangunahing kasanayan sa pag-iwas ay kinabibilangan ng:

- ✓ pisikal na pagdistansiya hanggang sa pinakamalayang posible,
- ✓ paggamit ng takip sa mukha ng mga manggagawa (kung hindi kinakailangan ang pamprotektang pangrespiratoryo) at mga panauhin,
- ✓ madalas na paghuhugas ng kamay at regular na paglilinis at pagdidis-impekta,
- ✓ pagsasanay ng mga manggagawa sa mga nabanggit at iba pang bahagi ng plano sa pag-iwas sa COVID-19.

Bukod pa rito, magiging napakahalaga na magkaroon ng mga naaangkop na proseso upang matukoy ang mga bagong kaso ng pagkakasakit sa mga lugar ng trabaho at, kapag natukoy na, ang mamagitan nang mabilis at makipagtulungan sa mga awtoridad sa kalusugan ng publiko upang mahinto ang pagkalat ng virus.

LAYUNIN

Nagbibigay ang dokumentong ito ng gabay para sa mga amusement park at theme park (tinukoy bilang "mga amusement park") upang suportahan ang ligtas, malinis na kapaligiran para sa mga manggagawa at customer. Dapat kilalanin at subaybayan ng mga negosyo ang Antas ng Panganib sa County para sa county kung saan gumagana ang negosyo at gumawa ng kailangang pagsasaayos sa kanilang operasyon:

- **Lila – Malaganap – Bahagdan 1:** Kailangang sarado ang lahat ng operasyon.
- **Pula – Malaki – Bahagdan 2:** Kailangang sarado ang lahat ng operasyon.
- **Kahel – Katamtaman – Bahagdan 3:** Pinapayagan ang mga operasyon_ tanging para sa mas maliit na mga parke (tingnan ang kahulugan sa ibaba) at kailangang ipatupad ng mga operator na ito ang mga sumusunod na pagbabago:
 - Ang mga mas maliit na parke ay tinukoy bilang mga parke na may pangkalahatang kapasidad na mas mababa sa 15,000 batay sa disenyo/kapasidad sa pagpapatakbo o limitasyon ng departamento ng bumbero para sa occupant.
 - Kailangang limitahan ang kapasidad sa 25% ng kabuuang pag-okupa sa pasilidad batay sa disenyo/kapasidad sa pagpapatakbo o limitasyon ng departamento ng bumbero para sa occupant - alinman ang mas kaunti - o 500 katao, alinman ang mas kaunti.
 - Tanging ang mga panlabas na atraksyon ang pinapayagan na buksan; lahat ng iba pang mga panloob na atraksyon ay kailangang manatiling sarado.
 - Kailangang limitado ang mga pagbebenta ng tiket sa mga bisita lamang na naninirahan sa parehong lalawigan ng lokasyon ng parke.
 - Kailangang sundin ng mga operator ang mga pagbabago sa gabay na ito at kailangang maging handa para sa pag-iinspeksyon ng mga opisyal sa kalusugan ng publiko upang matiyak ang sapat na pagpapatupad ng lahat ng kinakailangang pagbabago. Kailangang tugunan at ipatupad ng mga operator ang anumang mga natuklasan at rekomendasyon
- **Dilaw – Minimal – Bahagdan 4:** Pinapayagan ang pagpapatakbo para sa lahat ng mga operator ng amusement park na may mga sumusunod na pagbabago:
 - Kailangang limitahan ang kapasidad sa 25% ng kabuuang pag-okupa sa pasilidad batay sa disenyo/kapasidad sa pagpapatakbo o limitasyon ng departamento ng bumbero para sa occupant.
 - Ang kapasidad sa lahat ng panloob na establisimiyento ng mga pagkain at pag-inom sa loob ng parke ay kailangang limitado sa 25%.
 - Kailangang sundin ng mga operator ang mga pagbabago sa gabay na ito at kailangang maging handa para sa pag-iinspeksyon ng mga opisyal

sa kalusugan ng publiko upang matiyak ang sapat na pagpapatupad ng lahat ng kinakailangang pagbabago. Kailangang tugunan at ipatupad ng mga operator ang anumang mga natuklasan at rekomendasyon.

Para sa pinakabagong impormasyon sa katayuan ng bahagdan sa county, bisitahin ang [Blueprint para sa isang mas Ligtas na Ekonomiya](#). Mangyaring tandaan na ang mga lokal na departamento ng kalusugan ay maaaring magkaroon ng mas mahigpit na pamantayan at iba't ibang pagsasara. Hanapin [ang lokal na impormasyon ng iyong county](#).

TANDAAN: Ang mga amusement park ay may ilang mga aspeto sa pagpapatakbo at mga ipinagkakaloob na serbisyo na makikita sa iba pang gabay sa website na [Gabay ng Industriya upang Bawasan ang Panganib](#). Kailangang suriin ng mga operator ang gabay na ito upang mailapat ang naaangkop na mga protokol sa lahat ng aspeto ng kanilang operasyon. Maaaring kasama sa mga nasabing operasyon ang:

- Serbisyo sa pagkain at mga concession (Gabay ng Restaurant)
- Mga Bar (Gabay ng mga Bar, Breweries, at Distilleries)
- Mga tindahan ng regalo at pagpapatingi (Gabay sa Pagpapatingi)
- Mga hotel at lodging (Gabay ng mga Hotel, Lodging, at Panandaliang Pagrenta)
- Mga sentro ng libangan ng pamilya, kabilang ang maliit na golf at arcade (Gabay ng mga Family Entertainment Center)
- Mga interactive na exhibit (Gabay ng mga Zoo at Museo)
- Mga tram, shuttle, at iba pang mga transit (Gabay ng Public at Private Passenger Carriers, Transit, at Intercity Passenger Rail)
 - Limitahan ang serbisyo ng shuttle hangga't maaari at alinsunod sa mga obligasyon sa mga indibidwal na may mga kapansanan.
- Mga ground, pagmementena ng gusali, mga serbisyo sa pangangalaga (Gabay ng Limitadong Mga Serbisyo)

Ang gabay ay hindi inilaan upang bawiin o tanggalin ang anumang mga karapatan ng manggagawa, alinman sa batas, regulasyon o sama-samang kasunduan, at hindi kumpleto, dahil hindi kasama rito ang mga atas sa kalusugan ng county, ni hindi rin ito kapalit para sa anumang umiiral na mga kinakailangan sa regulasyon na may kaugnayan sa kaligtasan at kalusugan tulad ng mga yaong sa Cal/OSHA.¹ Manatiling impormado sa mga pagbabago sa gabay sa pampublikong kalusugan at mga pang-estado/lokal na atas, habang nagpapatuloy ang sitwasyon ng COVID-19. Ang Cal/OSHA ay may higit na gabay sa kaligtasan at kalusugan sa kanilang [webpage ng Gabay ng Cal/OSHA sa mga Kinakailangan upang Protektahan ang mga Manggagawa mula sa Coronavirus](#). May karagdagang patnubay ang CDC para sa [mga negosyo at employer](#).

Kinakailangang Paggamit ng mga Takip sa Mukha

Noong Hunyo 18, naglabas ang CDPH ng [Gabay sa Paggamit ng mga Takip sa Mukha](#), na pangkalahatang iniaatas ang paggamit ng mga takip sa mukha para sa mga miyembro ng publiko at manggagawa sa lahat ng lugar ng publiko at trabaho kung saan may mataas na panganib ng pagkakalantad.

Kailangang magsuot ang mga tao sa California ng mga takip sa mukha kapag nasa mga sitwasyong nakalista sa ibaba:

- Nasa loob ng, o nakapila upang makapasok sa, anumang panloob na pampublikong espasyo;
- Habang kumukuha ng mga serbisyo mula sa sektor ng pangangalagang pangkalusugan sa mga lugar na kinabibilangan ng, ngunit hindi limitado sa, ospital, parmasya, medikal na klinika, laboratoryo, tanggapan ng doktor o dentista, klinika ng betenaryo, o blood bank;
- Naghihintay ng o nakasakay sa pampublikong transportasyon o paratransit o habang nasa taksi, serbisyo ng pribadong kotse, o sasakyan para sa ride-sharing
- Nagtatrabaho, sa lugar ng trabaho o off-site, kung kailan:
 - Personal na nakikipag-ugnayan sa sinumang miyembro ng publiko;
 - Nagtatrabaho sa anumang espasyong binisita ng mga miyembro ng publiko, mayroon sinumang mula sa publiko na naroroon sa oras na iyon o wala;
 - Nagtatrabaho sa anumang espasyo kung saan naghahanda o nagbabalot ng pagkain para ibenta o ipamahagi sa iba;
 - Nagtatrabaho o naglalakad sa mga common area, tulad ng mga pasilyo, hagdanan, elevator, at paradahan;
 - Nasa anumang silid o kulob na lugar kung saan may iba pang tao (maliban sa mga miyembro ng sariling sambahayan o tirahan).
- Nagmamaneho o nagpapatakbo ng anumang pampublikong transportasyon o paratransit na sasakyan, taxi, o sasakyan para sa pribadong serbisyo ng kotse o ride-sharing kapag may mga pasahero. Kapag walang pasahero, mariing inirerekomenda ang mga takip sa mukha.
- Habang nasa labas sa mga pampublikong espasyo kung saan hindi magagawa ang pagpapanatili ng pisikal na distansya na 6 na talampakan mula sa ibang mga tao na hindi kasama sa parehong sambahayan o tirahan.

Makikita sa [gabay](#) ang kumpletong mga detalye, kasama ang lahat ng kinakailangan at pagbubukod sa mga patakarang ito. Mariing hinihikayat ang mga takip sa mukha sa iba pang pagkakataon, at maaaring magpatupad ang mga employer ng mga

karagdagang kinakailangan sa takip sa mukha sa pagtupad ng kanilang obligasyong magbigay ng ligtas at malusog na lugar ng trabaho. Kailangang bigyan ng mga employer ang mga manggagawa ng mga takip sa mukha o ibalik ang ibinayad ng mga manggagawa ng makatuwirang ginastos sa pagkuha ng mga ito.

Ang mga employer ay dapat bumuo ng patakaran sa akomodasyon para sa sinumang manggagawa na nakakatugon sa isa sa mga pagbubukod sa pagsusuot ng takip sa mukha. Kung ang isang manggagawa na dapat ay kinakailangang magsuot ng takip sa mukha dahil sa madalas na pakikipag-ugnayan sa iba ay hindi maaaring magsuot ng takip sa mukha dahil sa kondisyong medikal, dapat siyang bigyan ng hindi mahirap gamiting kahalili, tulad ng face shield na may drape na nakalaylay sa ilalim, kung posible, at kung maaari itong gawin sa kabila ng kondisyong medikal.

Dapat alam ng mga negosyong bukas sa publiko ang mga pagbubukod sa pagsusuot ng mga takip sa mukha na nasa [Gabay sa Takip sa Mukha ng CDPH](#) at hindi sila maaaring magbukod ng sinumang miyembro ng publiko para sa hindi pagsusuot ng takip sa mukha kung sumusunod siya sa [gabay](#). Kakailanganin bumuo ang mga negosyo ng mga patakaran para sa pangangasiwa ng mga pagbubukod na ito sa pagitan ng mga customer, kliyente, bisita, at manggagawa.

Ang [Gabay sa Takip sa Mukha ng CDPH](#) ay napapailalim sa mga karagdagang pag-update, mangyaring tingnan ang website ng CDPH para sa anumang mga update.



Planong Partikular sa Lugar ng Trabaho

- Magtatag ng plano sa pag-iwas sa COVID-19 na nakasulat at partikular sa lugar ng trabaho sa bawat pasilidad, magsagawa ng komprehensibong pagtatasa ng panganib sa lahat ng lugar ng trabaho at gawain sa trabaho, at magtalaga ng tao sa bawat pasilidad upang maipatupad ang plano.
- Isama ang [Gabay sa Takip sa Mukha ng CDPH](#) sa Planong Partikular sa Lugar ng Trabaho at maglagay ng patakaran para sa pangangasiwa ng mga pagbubukod.
- Alamin ang impormasyon sa pakikipag-ugnayan sa lokal na kagawaran ng kalusugan kung saan matatagpuan ang pasilidad para sa pagbibigay ng impormasyon tungkol sa mga paglaganap ng COVID-19 sa mga manggagawa o parokyano.
- Sanayin at kausapin ang mga manggagawa at kinatawan ng manggagawa tungkol sa plano at gawing available ang plano sa mga manggagawa at kanilang mga kinatawan.
- Regular na suriin ang lugar ng trabaho para sa pagsunod sa plano at idokumento at iwasto ang mga matutukoy na pagkukulang.

- Siyasatin ang anumang kaso ng COVID-19 at alamin kung may anumang salik na may kaugnayan sa trabaho na maaaring naging sanhi ng panganib sa impeksyon. I-update ang plano kung kinakailangan upang makaiwas sa karagdagang kaso.
- Ipatupad ang mga kinakailangang proseso at protokol kapag may paglaganap sa isang lugar ng trabaho, alinsunod sa [mga patnubay ng CDPH](#) at mga utos o gabay mula sa lokal na kagawaran ng kalusugan.
- Tukuyin ang mga malapitan na pakikipag-ugnayan (nasa loob ng anim na talampakan sa loob ng 15 minuto o mas matagal pa) ng isang nahawaang manggagawa at gumawa ng mga hakbang upang ibukod ang (mga) manggagawang nagpositibo sa COVID-19 at mga malapitan na nakaugnayan.
- Abisuhan ang lahat ng mga empleyado sa pamamagitan ng pagsulat, at mga employer ng mga kinokontratang empleyado, na maaaring nalantad sa COVID-19 at iulat ang mga paglaganap sa lugar ng trabaho sa lokal na kagawaran ng kalusugan. Para sa karagdagang impormasyon tungkol sa mga responsibilidad ng employer sa ilalim [AB 685](#) (Kabanata 84, Mga Batas ng 2020), sumangguni sa [Pinahusay na Pagpapatupad at Mga Kinakailangan sa Pag-uulat ng Employer](#) mula sa Cal/OSHA at ang [Mga Katanungan ng Employer tungkol sa AB 685](#) mula sa CDPH.
- **Para sa mga panlabas na operasyon:** Gumawa ng mabisang plano sa pag-iwas sa sakit na dulot ng init na may nakasulat na mga pamamaraan sa parehong Ingles at wikang naiintindihan ng karamihan ng mga empleyado. Ang plano ay dapat na magagamit ng mga empleyado sa lugar ng trabaho. Tingnan ang [pahina ng Cal/OSHA sa pag-iwas sa sakit na dulot ng init](#) para sa mga mapagkukunan, kabilang ang mga FAQ, isang webinar, at isang halimbawa ng nakasulat na plano. Kailangang kasama sa mga elemento ng isang plano sa pag-iwas sa sakit na dulot ng init ang:
 - Pag-access sa inuming tubig
 - Pag-access sa lilim
 - Mga pagpapahinga para magpalamig
 - Mga pamamaraang pang-emergency para sa mga kaso ng sakit na dulot ng init
 - Mga pamamaraan para sa mataas na init kapag ang temperatura ay lumagpas sa 95 degrees
 - Pagsubaybay sa mga empleyado na nagsasanay sa panahon ng heat wave
 - Pagsasanay sa pag-iwas sa sakit na dulot ng init at mga sintomas

- Sumunod sa mga patnubay sa ibaba. Ang kabiguang gawin ito ay maaaring magresulta sa mga karamdaman sa lugar ng trabaho na maaaring maging sanhi ng pansamantalang pagsasara o pagiging limitado ng mga operasyon.



Mga Paksa para sa Pagsasanay sa Manggagawa

- Impormasyon sa [COVID-19](#), paano mapipigilan ang pagkalat nito, at aling [mga tao ang mas mataas ang peligro](#) sa malubhang karamdaman o pagkamatay.
- Pag-screen sa sarili sa bahay, kasama ang pagsusuri ng temperatura at/o sintomas gamit ang [Mga patnubay ng CDC](#).
- Ang kahalagahan ng hindi pagpasok sa trabaho:
 - Kung may mga sintomas ng COVID-19 ang isang manggagawa gaya ng [inilarawan ng CDC](#), tulad ng lagnat o panginginig, pag-ubo, pagiging hrap sa paghinga, pagkapagod, pananakit ng kalamnan o katawan, pananakit ng ulo, bagong pagkawala ng panlasa o pang-amoy, namamagang lalamunan, baradong ilong o tumutulong sipon, pagduruwal, pagsusuka, o pagtatae, O
 - Kung ang isang manggagawa ay nadayagnos ng COVID-19 at hindi pa pinalalabas mula sa pagkakahiwalay, O
 - Kung, sa loob ng nakaraang 14 na araw, ang isang manggagawa ay nagkaroon ng ugnayan sa isang taong nadayagnos ng COVID-19 at itinuturing na posibleng nakakahawa (hal., nakahiwalay pa).
- Pagbalik sa trabaho matapos ang diagnosis ng COVID-19 pagkatapos lang matugunan ang [Gabay ng CDPH sa Pagbabalik sa Trabaho o Paaralan Pagkaraan ng Diagnosis ng COVID-19](#).
- Humingi ng medikal na atensyon kung lumubha ang kanilang mga sintomas, kasama na ang tuluy-tuloy na pananakit o presyon sa dibdib, pagkalito, o mangasul-ngasul na labi o mukha. May mga update at karagdagang detalye sa [webpage ng CDC](#).
- Ang kahalagahan ng madalas na paghuhugas ng kamay gamit ang sabon at tubig, kasama ang pagkuskos ng sabon sa loob ng 20 segundo (o paggamit ng hand sanitizer na may hindi bababa sa 60% ethanol (mas mainam) o 70% isopropanol (kung hindi magagamit ng mga batang walang patnubay ang produkto) kapag hindi makakapaghugas ng kamay ang mga manggagawa, alinsunod sa [Mga patnubay ng CDC](#)). Huwag kailanman gumamit ng mga hand

sanitizer na may [methanol](#) dahil labis itong nakakalason sa parehong mga bata at matatanda.

- Ang kahalagahan ng physical distancing, kapwa sa oras ng trabaho at sa labas ng trabaho (tingnan ang seksyon ng Physical Distancing sa ibaba).
- Wastong paggamit ng mga takip sa mukha, kabilang ang:
 - Ang mga takip sa mukha ay hindi personal na kagamitan sa proteksyon (PPE).
 - Ang mga takip sa mukha ay hindi pamalit sa pangangailangan para sa pisikal na pagdistansya at madalas na paghuhugas ng kamay.
 - Dapat takpan ng mga takip sa mukha ang ilong at bibig.
 - Dapat maghugas o mag-sanitize ng mga kamay ang mga manggagawa bago at pagkatapos gumamit o magsaayos ng mga takip sa mukha.
 - Iwasang hawakan ang mga mata, ilong, at bibig.
 - Hindi dapat ipahiram sa iba ang mga takip sa mukha at dapat labhan o itapon ang mga ito pagkatapos ng bawat shift.
- Impormasyong nasa [Patnubay ng CDPH para sa Paggamit ng mga Takip sa Mukha](#), na ipinag-uutos ang mga sitwasyon kung saan dapat magsuot ng mga takip sa mukha at ang mga pagbubukod, pati na rin ang anumang patakaran, panuntunan sa trabaho, at kasanayang ipinatupad ng employer upang matiyak ang paggamit ng mga takip sa mukha. Kasama rin dapat sa pagsasanay ang mga patakaran ng employer tungkol sa kung paano pangangasiwaan ang mga taong nakabukod sa pagsusuot ng takip sa mukha.
- Mga sintomas at pag-iwas sa sakit na dulot ng init [na sumusunod sa mga kinakailangan ng Cal/OSHA](#).
- Tiyaking maayos na sinanay sa mga patakaran sa pag-iwas sa COVID-19 at may kinakailangang supply at PPE ang hiwalay na kontratista at pansamantala o nakakontratang manggagawa sa pasilidad. Maagang pag-usapan ang mga responsibilidad na ito kasama ng mga organisasyong nagbibigay ng mga pansamantala at/o nakakontratang manggagawa.
- Impormasyon sa mga benepisyong may bayad na bakasyon na maaaring may karapatang tanggapin ng manggagawa na mas magpapadali sa larangan ng pananalapi upang manatili sa bahay. Tingnan ang karagdagang impormasyon sa mga programa ng [pamahalaan na sumusuporta sa mga may-bayad na sick leave at bayad-pinsala sa mga manggagawa para sa COVID-19](#), kabilang ang

mga karapatan ng mga manggagawa sa may-bayad na sick leave sa bisa ng [Families First Coronavirus Response Act](#).



Mga Indibidwal na Hakbang sa Pagkontrol at Pag-screen

- Sapilitan ang paggamit ng mga takip sa mukha sa buong parke sa lahat ng mga lugar sa loob at labas, maliban kung kasalukuyang kumakain o umiinom sa mga itinalagang lugar ng kainan o exempted ayon sa [Gabay sa Takip sa Mukha ng CDPH](#). Ang mga customer na hindi sumusunod ay dapat agad na alisin sa pasilidad.
- Magbigay ng mga screening ng temperatura at/o mga sintomas para sa lahat ng mga manggagawa sa simula ng kanilang shift at sinumang mga nagtitinda o mga kontratista na pumapasok sa parke. Tiyaking iniwasan ng screener ng temperatura/sintomas ang malapit na pakikisalamuha sa mga manggagawa hangga't maaari.
- Kung nangangailangan ng screening sa sarili sa bahay, na isang naaangkop na alternatibo sa pagbibigay nito sa establisamiyento, tiyaking nagsagawa ng screening bago umalis sa bahay ang manggagawa para sa kanilang shift at sumusunod ito sa mga [patnubay ng CDC](#), tulad ng inilalarawan sa seksyong Mga Paksa para sa Pagsasanay sa Manggagawa sa itaas.
- Hikayatin ang mga manggagawa na may sakit o nagpapakita ng mga sintomas ng COVID-19 na manatili sa bahay.
- Ang mga employer ay dapat magbigay at tiyakin na ginagamit ng mga manggagawa ang lahat ng kinakailangang kagamitan sa proteksiyon, kabilang ang proteksyon sa mata at guwantes kung kinakailangan.
- Dapat isaalang-alang ng mga employer kung saan ang paggamit ng pwedeng itapon na glove ay maaaring makatulong upang madagdagan ang madalas na paghuhugas ng kamay o paggamit ng hand sanitizer; halimbawa ay para sa mga manggagawa na sumusuri sa iba para sa mga sintomas o humahawak sa mga karaniwang bagay na hinahawakan. Ang mga manggagawa ay kailangang mabigyan at magsuot ng guwantes kapag tumatanggap ng mga item na hinawakan ng iba (hal. cash o barya) o humahawak ng mga item na kontaminado ng mga likido ng katawan.
- Ang mga manggagawa na patuloy na kailangang nasa loob ng anim na talampakan ng mga panauhin o kasamahan sa trabaho (hal., ang pagpapasuot at pag-secure sa mga panauhin ng kagamitang pangkaligtasan) ay kailangang magsuot ng pangalawang hadlang

(hal. face shield o mga safety goggle) bilang karagdagan sa takip sa mukha. Ang lahat ng mga manggagawa ay dapat bawasan ang dami ng oras na ginugugol sa loob ng anim na talampakan mula sa mga panauhin.

- Magpatupad ng isang sistema ng pagpapareserba para sa parke. Gamitin ang sistema ng pagpapareserba upang makipag-ugnay sa mga panauhin (hal. sa pamamagitan ng email, tawag, o text) na may mga pagpapareserba 24 na oras bago ang kanilang naka-iskedyul na pagdating upang kumpirmahin ang kanilang reserbasyon at tanungin kung sila o ang isang tao sa kanilang sambahayan ay nagpapakita ng anumang mga sintomas ng COVID-19. Kung oo ang sagot ng panauhin dapat pagbilinan ang panauhin na hindi sila dapat pumunta sa amusement park dahil hindi sila papayagang pumasok.
- Kung maaari, magpatupad ng isang sistema ng pagpapareserba o virtual na sistema ng pagpila para sa mga indibidwal na atraksyon upang matiyak na ang mga limitasyon sa kapasidad at pisikal na pagdistansya ay mapanatili.
- Gumawa ng patakaran na nag-aatas sa mga panauhin na magsuot ng mga takip sa mukha o hindi papapasukin sa amusement o theme park. Papasukin ang mga panauhin na exempted sa pagsusuot ng mga takip sa mukha tulad ng nakasaad sa [Gabay sa Takip sa Mukha ng CDPH](#). Bilang bahagi ng patakaran, paalalahanan ang mga panauhin nang maaga na magdala ng takip sa mukha at maghanda ng mga ganito na ibibigay sa sinumang dumarating na wala nito.
- Dapat ma-screen ang temperatura at/o sintomas ng mga panauhin sa pagdating, hilinging gumamit ng hand sanitizer, at kailangang magdala at magsuot ng takip sa mukha kapag hindi kumakain o umiinom kung hindi exempted ayon sa [Gabay sa Takip sa Mukha ng CDPH](#). Kailangang kanselahin ng mga operator ng amusement park ang mga pagpapareserba ng mga indibidwal/partido na may mga panauhing may sintomas at huwag papasukin.
- Ipakita ang isang hanay ng malinaw na nakikitang mga patakaran at paalala, kabilang ang pagpaskil ng karatula sa mga pasukan at sa iba pang mga mahalaga at madaling makitang mga lokasyon at sa mga kumpirmasyon sa pagbili ng tiket, para sa mga panauhin at tauhan na magiging kundisyon sa pagpasok at kailangang masunod sa kabuuan ng pagbisita ng panauhin sa amusement park. Dapat isama sa mga patakaran ang mga tagubilin na magsuot ng takip sa mukha sa lahat ng oras, maliban kung kumakain o umiinom sa mga itinalagang lugar na kainan; gumamit ng hand sanitizer; panatilihin ang pisikal na distansya mula sa iba pang mga panauhin at manggagawa; at iwasan ang hindi kinakailangang paghawak sa mga ibabaw. Kapag posible, dapat mabasa ang mga patakaran sa digital na paraan, hal. sa pamamagitan ng mga app, text, o email.

- Magtalaga ng sapat na bilang ng mga kawani upang ipatupad ang pagsunod sa mga kinakailangang takip sa mukha sa buong parke upang matiyak na mapanatili ang pisikal na pagdistansya sa lahat ng mga lugar, na may partikular na pagtuon sa mga pila at iba pang mga lugar na posibleng pagkukumpulan ng mga tao. Ang mga panauhin na hindi sumusunod ay dapat agad na alisin sa pasilidad. Pahintulutan ang mga exemption na tinukoy sa [Gabay sa Takip sa Mukha ng CDPH](#).



Mga Protokol sa Bentilasyon, Paglilinis at Pagdisimpekta

- Magpatupad ng mga paraan upang mabawasan ang oras sa loob at mabawasan ang bilang ng mga pangkat ng sambahayan na sabay na nasa loob at nakatigil.
- Kung saan maaari, mag-install ng mabibitbit na mga mabisang panlinis ng hangin, i-upgrade ang mga pansala ng hangin sa loob ng gusali sa posibleng pinakamataas na kahusayan, at gumawa ng iba pang mga pagbabago upang madagdagan ang dami ng hangin mula sa labas at bentilasyon sa mga tanggapan at iba pang mga espasyo sa loob.
- Pana-panahong tingnan ang [Website ng CDPH](#) para sa mga pag-update sa gabay sa kalidad ng panloob na hangin at bentilasyon para sa mga sakit na dinadala ng hangin sa mga panloob na lugar.
- Magsagawa ng masusing paglilinis sa mga lugar na pinupuntahan ng marami tulad ng mga pasukan at labasan ng parke, mga banyo at mga lugar na pagpapalitan ng suot ng sanggol, mga lugar na kainan, mga tindahan ng regalo, istasyon ng shuttle/tram o hintuan, mga silid-pahingahan ng manggagawa, atbp., at mga lugar ng pagpasok at paglabas, kabilang ang mga hagdanan, mga hawakan ng kamay, at mga elevator bank. Idisimpekta nang madalas ang karaniwang ginagamit na mga ibabaw, kabilang ang mga ibabaw ng counter, mga touchscreen, mga pindutan, mga pihitan ng pintuan, mga patungan ng braso, mga banyo, mga ginagamitan ng barya at tubusan ng laro, mga vending machine, atbp.
- Linisin at disimpektahin nang mabuti ang bawat lugar ng aktibidad ng panauhin pagkatapos ng bawat paggamit. Dapat isama dito ang paglilinis at pagdidisimpekta ng mga mesa, upuan, bangko, booth, booster seat, high chair, atbp. Maghintay ng sapat na oras para sa tamang pagdidis-impekta, na sumusunod sa mga tagubilin ng produkto.
- I-adjust o baguhin ang oras upang magbigay ng sapat na oras para sa regular na masusing paglilinis at pagdisimpekta.

- Kung maaari, iwasan ang mga transaksyon na gumagamit ng cash at gumamit ng card reader na nagbibigay-daan sa mga panauhin na i-insert/i-swipe ang kanilang sariling mga kard, para hindi kailangang gawin ito ng mga manggagawa para sa kanila. Kung makalalabag ang mga credit card machine sa pisikal na distansya, dapat na umatras ang mga manggagawa habang nagbabayad ang panauhin. Kung saan posible at naaangkop, makipagtulungan sa mga kasosyo sa pagbabayad upang madagdagan ang mga limitasyon ng dolyar para sa mga pagbili na hindi nangangailangan ng Personal na Identification Number (PIN) o pirma.
- Magtalaga ng isang manggagawa sa bawat terminal ng Point-of-Sale (POS), kung maaari. Malinis at magdisimpekta ng mga terminal sa pagitan ng bawat gumagamit at pagkatapos ng bawat shift. Kung maraming manggagawa ang naatasan sa isang terminal ng POS, dapat maghugas ng kamay ang mga manggagawa ng sabon at tubig o gumamit ng hand sanitizer bago at pagkatapos ng bawat paggamit.
- Linisin at disimpektahin ang mga stroller, electric conveyance na sasakyan, at wheelchair sa pagitan ng bawat pag-upa. Isaalang-alang ang pagbibigay ng karagdagang pandisimpektang mga pamunas sa mga panauhin upang mapupunasan din nila ang mga yunit sa sandaling inupahan nila ang mga ito.
- Magbigay ng mga itinatapon o isahang gamit na mapa, pamphlet, gabay, atbp. sa mga panauhin at gawin itong makukuha nang digital upang makikita ito ng mga bisita sa isang personal na elektronikong aparato, kung maaari. Kung hindi maibigay ang isang-gamitan lang na mga bagay, disimpektahin nang mabuti ang mga magagamit muli na bagay bago at pagkatapos gamitin ng panauhin.
- Tiyaking patuloy ang pagtakbo ng mga pasilidad ng sanitasyon at may stock ang mga ito sa lahat ng oras at magbigay ng karagdagang sabon, papel na tuwalya, at hand sanitizer kung kinakailangan. Magbigay ng mga magagamit upang maitaguyod ang personal na kalinisan. Kasama rito ang mga tisyu, hindi hinahawakan na mga basurahan, mga sabon sa kamay, sapat na oras para sa paghugas ng kamay, mga hand sanitizer na may alkohol, mga pandisimpekta na pamunas, at mga disposable na tuwalya
- Magbigay ng karagdagang mga lugar para sa paghuhugas ng kamay o hand sanitizer sa buong amusement park, kasama ang mga counter ng tulong, mga desk ng impormasyon, atraksyon, rides, mga bintana ng booth ng tiket, mga lugar na kainan, mga tindahan ng regalo, at mga pinapasukan.

- Tiyaking may magagamit na hand sanitizer ang mga panauhin kapag nadidikit ang mga bagay sa aktibidad sa mga pinagsasaluhang ibabaw. Hikayatin ang mga panauhin na madalas na maghugas ng kamay at/o gumamit ng hand sanitizer habang gumagamit ng kagamitan at bagay. Paalalahanan ang mga miyembro ng publiko (gamit ang mga karatula at/o nang pasalita) na huwag hawakan ang kanilang mga mata, ilong, at bibig.
- Regular na linisin at dis-impektahin ang mga ibabaw na pinagbabahaginan ng mga manggagawa sa pagitan ng mga shift o sa pagitan ng mga gumagamit, alinman ang mas madalas, kabilang ang ngunit hindi limitado sa mga ibabaw na pinagtatrabahuhan, mga orasan, mga copy machine, mga susi, kagamitan sa paglilinis, makinarya sa paglalaro, atbp. Iwasan ang pagbabahaginan ng mga kagamitan tulad ng mga telepono, tablet, makinarya sa opisina, at mga gamit hangga't posible. Huwag kailanman maghiraman ng PPE.
- Itigil ang pagsasalong pagpapagamit ng mga audio headset, tools, at iba pang kagamitan sa pagitan ng ba't ibang manggagawa maliban kung ang kagamitan ay maaaring disimpektahin nang maayos pagkatapos gamitin. Kumonsulta sa mga tagagawa ng kagamitan upang matukoy ang naaangkop na mga hakbang sa pagdi-disinfect, lalo na sa malalambot at buhaghag na ibabaw tulad ng foam earmuffs. Isaalang-alang ang pagbibigay ng mga disposable na takip ng earphone kung maaari.
- Maglaan ng oras para sa mga manggagawa upang maipatupad ang mga kasanayan sa paglilinis sa panahon ng kanilang shift. Magtalaga ng mga tungkulin sa paglilinis sa oras ng pagtatrabaho bilang bahagi ng mga tungkulin sa trabaho ng manggagawa.
- Paglaanan ang mga terminal, mga mesa, at mga counter ng tulong ng wastong mga produktong panlinis, kabilang ang mga hand sanitizer at mga pamunas na pandisimpekta, at bigyan ng mga personal na hand sanitizer ang lahat ng kawani na direktang tumutulong sa mga panauhin.
- Upang mabawasan ang panganib ng [Legionnaires' disease](#) at iba pang mga sakit na nauugnay sa tubig, [gumawa ng mga hakbang](#) upang matiyak na ang lahat ng mga sistema ng tubig at tampok (hal., mga fountain na inuman, pandekorasyon na mga fountain) ay ligtas na gamitin pagkatapos ng matagal na pagsasara ng pasilidad.
- Kapag pumipili ng mga kemikal na pandisimpekta, dapat gamitin ang mga produktong inaprubahan para magamit laban sa COVID-19 na nasa listahang [aprubado-ng-Environmental Protection Agency \(EPA\)](#) at sundin ang mga tagubilin sa produkto. Gumamit ng mga disinfectant na may label na epektibo laban sa mga bagong virus na

pathogen, na malabnaw na pambahay na solusyon ng bleach (5 tablespoon bawat galon ng tubig), o alkohol na solusyon na may hindi bababa sa 70% alkohol na naaangkop para sa ibabaw. Bigyan ang mga manggagawa ng pagsasanay sa mga panganiib ng kemikal, tagubilin ng manufacturer, kinakailangan sa bentilasyon, at kinakailangan ng Cal/OSHA para sa ligtas na paggamit. Ang mga manggagawang gumagamit ng mga panlinis o pandisimpekta ay kailangang magsuot ng guwantes at iba pang kagamitan sa proteksyon tulad ng hinihingi ng mga tagubilin ng produkto. Sundin ang [mga paraan ng paglilinis na ligtas sa may hika](#) na inirerekomenda ng Kagawaran ng Pampublikong Kalusugan ng California at siguraduhing may wastong bentilasyon.



Mga Patnubay sa Pisikal na Pagdistansiya

- **BABALA:** hindi sapat ang pisikal na pagdistansya lang sa pag-iwas sa pagpapasa ng COVID-19 sa loob ng mga gusali.
- Isaalang-alang ang one-way na direksyon ng mga tao at malinaw na mga direksyon upang mas mahusay na makontrol ang daloy ng mga panauhin sa buong park, lalo na sa ilang mga palaging nagagamit at/o makitid na mga daanan upang pahintulutan ang mas mahusay na paghihiwalay ng panauhin. Limitahan ang pagpasok sa mga mataong lugar upang mabigyang-daan ang naaangkop na pisikal na pagdistansya.
- Maglaan ng kawani na gagabay sa mga panauhin sa mga lugar na matao at masisikip na lugar sa mga panloob at panlabas na pasilidad upang maiwasan ang pagkukumpulan. Isaalang-alang ang paggamit ng mga naka-costume na miyembro ng cast o iba pang mga manggagawa upang lumikha ng isang nakalaan na pangkat na makakatulong sa regular na pagbibigay-alam sa mga panauhin tungkol sa mga bagong protokol.
- Mag-install ng mga divider na Plexiglass o mga switchback line/queue sa mga atraksyon o concession, o isara ang mga seksyon ng mga switchback line/queue upang matiyak ang sapat na pisikal na distansya sa pagitan ng mga bisita.
- Magpatupad ng mga hakbang upang matiyak ang pisikal na pagdistansya na hindi bababa sa anim na talampakan sa pagitan ng mga tao, tulad kapag ang mga panauhin ay naghihintay sa pila, sumasakay sa mga shuttle o tram sa parke, o habang nakaupo para sa mga pagtatanghal o palabas. Maaaring kasama rito ang paggamit ng mga pisikal na partisyon o makikitang palatandaan

(halimbawa, mga marka sa sahig o karatula upang ipahiwatig kung saan dapat tumayo ang mga manggagawa at panauhin). Tiyaking ang mga panloob na limitasyon sa kapasidad ay nakapaskil at ipinatutupad para sa panloob na tingian at iba pang mga panloob na espasyo.

- Ipatupad ang de-oras at/o mga abanseng sistema ng pagreserba ng tiket at mga paunang pagtalaga ng mga upuan o lugar ng aktibidad, hangga't maaari, upang unti-unti ang mga pagbisita ng panauhin at makatulong na mapanatili ang pisikal na distansya.
- Itigil ang mga paglilibot o ginagabayang mga karanasan na pinagsasama ang mga sambahayan o mga indibidwal mula sa iba't ibang mga sambahayan sa parehong pangkat ng paglilibot. Ang mga gabay sa paglilibot ay kailangang magpanatili ng hindi bababa sa anim na talampakang pisikal na distansya mula sa mga panauhin. Limitahan ang mga paglilibot o ginagabayang karanasan sa mga yunit ng sambahayan.
- Pag-isipang mag-alok sa mga manggagawa na humihiling ng mga binagong tungkulin ng opsyon na makakabawas sa kanilang pakikisalamuha sa mga panauhin at iba pang manggagawa (halimbawa, pamamahala ng imbentaryo sa halip na pagtatrabaho bilang kahera o pamamahala ng mga pangangailangang administratibo sa pamamagitan ng telework).
- Muling ayusin ang mga lugar ng trabaho, kung maaari, upang bigyang-daan ang anim na talampakang pagitan ng mga manggagawa at ng publiko. Magsagawa ng mas maliit na mga pagpupulong upang mapanatili ang mga alituntunin sa pisikal na pagdistansya at isaalang-alang ang pagpupulong sa labas o sa pamamagitan ng mga online na platform o sa telepono.
- Tiyaking mapanatili ng mga manggagawa ang pisikal na distansya sa mga silid-pahingahan, paggamit ng mga hadlang, pagdaragdag ng distansya sa pagitan ng mga mesa/upuan upang paghiwa-hiwalayin ang mga manggagawa, atbp. Kung maaari, lumikha ng mga lugar ng pahingahan sa labas na may mga takip sa init at mga ayos ng upuan na nagsisiguro sa pisikal na pagdistansya. Huwag hayaang magkumpol-kumpol ang mga manggagawa sa panahon ng pahinga at tiyaking hindi sila kumakain o umiinom nang walang takip sa mukha sa loob ng anim na talampakan ng bawat isa.
- Maglagay ng karagdagang mga limitasyon sa bilang ng mga manggagawa sa mga kulob na lugar, tulad ng mga supply room at counter area, upang matiyak ang hindi bababa sa anim na talampakan na distansya upang malimitahan ang pagkakahawa ng virus.

- Isalit-salit ang mga oras ng pahinga ng manggagawa, alinsunod sa mga regulasyon sa sahod at oras, upang mapanatili ang mga protokol sa pisikal na pagdistansya.



Karagdagang Mga Pagsasaalang-alang para sa Pagtanggap, Pagpasok, at Seguridad

- Siguraduhin na ang mga lugar ng paradahan, pasukan, at labasan ay namarkahan, sinusubaybayan, at isinaayos upang bigyang-daan ang pisikal na pagdistansya at walang pagsisiksikan o pagkukumpulan.
- Ang paggamit ng mga takip sa mukha ay sapilitan sa buong parke sa lahat ng mga lugar sa loob at labas, maliban kung kasalukuyang kumakain at/o umiinom. Ang mga panauhin na hindi sumusunod ay dapat agad na alisin sa pasilidad. Pahintulutan ang mga exemption na tinukoy sa [Gabay sa Takip sa Mukha ng CDPH](#).
- Isaalang-alang ang mga paraan upang mag-iskedyul ng unti-unting pagpasok upang mabawasan ang mga linya para sa wanding, bag check, at pag-scan ng tiket. Halimbawa, ang virtual na pila, ay maaaring magbigay ng de-metrong access sa harap ng isang linya.
- Protektahan ang mga opisina ng ticketing at will call ng mga hindi tinatagusang hadlang, tulad ng Plexiglass. Pagbilinan ang mga panauhin kung saan pipila upang mapanatili ang minimum na anim na talampakan na pisikal na distansya.
- Mag-install ng mga divider na Plexiglass sa anumang mga switchback line/queue, kabilang ang mga lugar ng pagpila para sa pagpasok, seguridad, at pagtanggap, o isara ang mga seksyon ng switchback line/queue upang matiyak ang sapat na pisikal na distansya na hindi bababa sa anim na talampakan sa pagitan ng mga bisita.
- Hikayatin ang mga panauhin na bumili online (bago ang kanilang pagbisita) o mula sa mga app sa sandaling nasa loob na sila ng parke upang mabawasan ang mga linya at mga transaksyon sa pagbabayad sa site. Kung posible, iwasan ang mga papel na tiket na nangangailangan hawakan ng mga manggagawa para sa pag-scan. Isaalang-alang kung maaaring i-check in ng mga panauhin ang kanilang mga sarili sa mga self-service kiosk sa labas ng lugar ng pag-screen ng kalusugan at seguridad.
- Pag-isipang mag-alok ng all-inclusive package deal/mga wristband na nagsasama ng pagpasok sa parke, paradahan, pagkain at

inumin, at mga espesyal na pag-upgrade tulad ng nakareserba na upuan at pag-upa ng cabana upang mabawasan ang bilang ng mga transaksyong ginagawa sa loob ng parke.

- Ang mga manggagawa na sumusuri sa mga bag ay dapat na magbago ng mga aktibidad upang mabawasan ang direktang paghawak sa mga item ng panauhin. Maaaring isama dito ang paggamit ng mga stylus o iba pang mga instrumento upang maghanap sa mga bag, paghiling sa mga panauhin na buksan ang mga bag at ilipat ang mga nilalaman, atbp. Kung saan ang mga kalakaran ay maaaring maging sanhi ng direktang pakikipag-ugnay sa mga parokyano o sa kanilang mga item, dapat agad na i-sanitize ng mga manggagawa ang mga kamay o magsuot ng mga disposable na guwantes at magbago sa pagitan ng bawat iniinspekyon na panauhin.
- Upang maiwasang hawakan ang mga personal na item ng mga panauhin, dapat isaalang-alang ng mga operator ng parke ang pagpapatupad ng patakaran na paggamit ng maliit na malinaw na bag at hilingin sa mga panauhin na buksan ang kanilang sariling mga bag para sa inspeksyon. Isaalang-alang ang mga kinakailangang eksepsyon para sa mga produktong medikal at produkto para sa personal na kalinisan.
- Magpatupad ng mga tool sa seguridad na nagpapahintulot sa mga manggagawa na mapanatili ang hindi bababa sa anim na talampakan na pisikal na distansya mula sa mga parokyano. Maaaring isama dito ang paggamit ng mga walk-through metal detector sa halip na mga hand wand metal detector.
- Ang mga walk-through metal detector ay epektibo sa pagtuklas ng mga metal na bagay habang binibigyang-daan ang mga manggagawang panseguridad na mapanatili ang distansya. Ang mga wand sa kamay ay mas murang alternatibo na nagpapahintulot pa rin sa no-contact metal detection, ngunit kinakailangang mas malapit ang manggagawang panseguridad kaysa sa anim na talampakan mula sa panauhin. Ang sinumang manggagawa na nagsasagawa ng pagkapkap ay kailangang magsuot ng mga disposable na guwantes na agad na itatapon pagkatapos ng pakikipag-ugnayan sa isang panauhin, na sinusundan ng paghuhugas ng kamay o hand sanitizer bago maglagay ang bagong pares ng guwantes.
- Mag-install at gumamit ng mga hindi hinahawakang ticket scanner kung maaari. Hilingin sa mga panauhin na sila mismo ang mag-scan ng kanilang mga tiket sa halip na magpasahan ng mga digital na elektronikong aparato o mga papel na tiket ang mga manggagawa at parokyano. Kung kailangang tulungan ng mga manggagawa ang

mga parokyano at kinakailangan ang paghawak, kailangang magsuot ang mga manggagawa ng takip sa mukha at maghugas ng kamay at/o gumamit ng hand sanitizer tulad ng inilarawan sa gabay na ito. Dapat magsuot ang mga panauhin ng takip sa mukha habang nakikipag-ugnayan at hinihikayat na maghugas din ng kamay at/o gumamit ng hand sanitizer matapos na makipagpalitan din ng kalakal.

- Suriin ang mga kaayusan ng locker kung saan itinatabi ng mga panauhin ang mga personal na pag-aari upang matiyak na ang mga espasyong iyon ay maaaring regular na malilinis at madisimpekta at may naaangkop na puwang upang pahintulutan ang pisikal na pagdistansya. Isaalang-alang ang pagsasara o pag-ikot ng ilang mga seksyon upang payagan ang naaangkop na pisikal na pagdistansya sa mga abalang oras. Magpaskil ng mga karatula na nagpapaalala sa mga panauhin na panatilihin ang mga pisikal na distansya na hindi bababa sa anim na talampakan at maghintay na umalis ang iba bago lumapit sa locker. Isaalang-alang ang paglalagay ng isang manggagawa sa lugar ng locker upang limitahan ang bilang ng mga taong nagkakasabay sa espasyo. Maglinis at magdisimpekta ng mga locker sa pagitan ng bawat paggamit o magbigay ng mga bag upang maipasok ng mga panauhin ang kanilang mga personal na item sa mga bag bago ilagay ang mga ito sa isang locker.
- Kapag may emergency, dapat isaalang-alang at planuhin ng mga operator ng amusement park ang pisikal na pagdistansya sa mga lugar na pinapasukan/nilalabasan at mga lugar ng pagtatanghal ng panauhin.



Karagdagang Mga Pagsasaalang-alang para sa Lahat ng Rides at Atraksyon

- Ang takip sa mukha ay sapilitan kapag nakikibahagi sa mga atraksyon at mga ride sa buong parke. Pahintulutan ang mga exemption na tinukoy sa [Gabay sa Takip sa Mukha ng CDPH](#).
- Mag-install ng mga divider na Plexiglass o mga switchback line/queue, kabilang ang mga pagpila sa mga ride at mga atraksyon, o isara ang mga seksyon ng mga switchback line/queue upang matiyak ang sapat na pisikal na distansya sa pagitan ng mga bisita.
- Ang lahat ng pagpila ay kailangang gawin sa labas lamang. Hindi pinapayagan ang pagpila sa loob para sa anumang atraksyon o ride. Para sa mga panloob na atraksyon at ride, gumawa ng

panlabas na sistema ng pagpila bago pumasok sa panloob na operasyon ng atraksyon. Mag-install ng hindi tinatagusang mga hadlang sa pagitan ng mga switchback queueing area o isara ang mga seksyon ng switchback line/queue upang matiyak ang sapat na pisikal na distansya sa pagitan ng mga bisita.

- Isaalang-alang ang mga alternatibong pamamaraan ng pagpila kung saan posible upang pamahalaan ang kapasidad at mapadali ang pisikal na pagdistansya. Kailangang magsuot ang mga panauhin ng takip sa mukha at hindi kukulangin sa anim na talampakan ang layo sa isa't isa habang pumipila. Isaalang-alang ang paggamit ng virtual na sistema ng pagpila kung saan praktikal (hal. maaaring gumawa ang mga panauhin ng mga online na pagpapareserba para sa mga partikular na atraksyon sa pamamagitan ng isang app o habang nasa proseso ng pagbili ng tiket). Maglaan ng tauhan na susubaybay sa pagsunod ng mga panauhin sa pagdistansya at mga takip sa mukha habang nasa pila.
- Suriin ang bilis at iba pang mga dynamics ng bawat atraksyon upang matiyak na ang mga iba't ibang uri ng takip sa mukha (hal. karaniwang mga surgical mask na may mga pansabit sa tainga, mga takip sa mukha na may strap na nakapalibot sa ulo, bendahe o iba pang tela na nakapalibot sa ulo) ay maaaring ligtas na isuot at nakapirme sa mga ride. Ang mga takip sa mukha ay hindi dapat magpakita ng panganib ng maluwag na artikulo o makagambala sa ligtas na pagpapatakbo sa atraksyon kapag ginamit ng alinman sa mga sumasakay o mga operator ng ride. Kung kinakailangan, kumunsulta sa tagagawa/supplier ng ride upang ipasya kung aling mga uri ng takip sa mukha ang angkop para sa mga partikular na ride.
- Ihinto ang paggamit ng ride o atraksyon kung saan ang paggamit ng mga takip sa mukha ay nagdudulot ng isyu sa kaligtasan o mataas na insidente ng pagkawala ng takip ng mukha sa panahon ng operasyon.
- Kailangang may available na mga takip sa mukha sa mga bisita na nawalan ng kanilang takip sa mukha habang sumasakay o nasa atraksyon.
- Ang protokol sa paglilinis at pagdidisimpekta ay mahalaga para sa mga madalas na hinahawakang ibabaw sa mga ride at atraksyon. Regular na linisin at disimpektahin ang lahat ng mga ibabaw na madalas na hinahawakan ng mga panauhin o manggagawa, kabilang ang mga hawakan ng kamay, patungan ng braso, mga restraint, lap bar, grips, seatbelts, harness sa balikat, atbp. Gumawa ng dalas at diskarte sa proseso ng paglilinis at pagdidisimpekta alinsunod sa mga tagubilin sa produktong panlinis at mga direksyon

ng tagagawa ng ride at batay sa uri ng ibabaw na nililinis.

Siguraduhin na ang mga oras ng pagpatay ng virus at ang mga oras ng pagpapatuyo ay isinasaalang-alang bago buksan ang atraksyon o pagpapasakay ng mga panauhin para sa susunod na ikot.

Siguraduhin na ang ride ay ligtas at sundin ang naaangkop na mga pamamaraan sa pagkontrol ng mapanganib na enerhiya (kasama ang pangkaligtasan na "lock out, tag out" kung kinakailangan) upang ligtas na ma-access ng mga manggagawa ang mga lugar na kailangan nilang linisin.

- Madalas na linisin at disimpektahin ang lahat ng control at dispatch panel, mga pindutan/switch, o iba pang mga ibabaw na hinahawakan ng operator na ginagamit upang makontrol ang ride sa minimum sa pagitan ng bawat pagrerelebo ng manggagawa, at bigyan ang mga manggagawa na nagpapatakbo ng rides ng hand sanitizer at oras para sa paghuhugas ng kamay.
- Sundin ang mga alituntunin ng tagagawa/standard operating protocols upang matiyak na naka-lock ang mga restraint, nakakabit ang mga seatbelt, at maayos na na-secure ang mga rider.
- Kung kailangang gamitin ng mga manggagawa ang kanilang mga kamay upang matiyak na naka-lock ang gate at ligtas ang ride, kailangang maghugas ng kamay ang mga naturang manggagawa bago lumipat sa ibang gawain.
- Magsagawa ng mga pagsusuri sa taas ayon sa mga umiiral na mga protokol upang matiyak na tumpak ang mga ito. Isaalang-alang ang pagpapahusay sa mga pagsusuri ng taas upang gawing touch-free at madaling pamahalaan ang mga ito at makikita sa layo na ilang talampakan (hal. madaling makitang mga marker ng taas, nakataas na bar para tumayo ang panauhin sa ilalim.)
- Ayusin ang mga pattern sa paglo-load ng upuan, kung kinakailangan, upang sumunod sa mga kinakailangan sa pisikal na pagdistansya. Kasama sa mga halimbawa ang pag-upo sa kada dalawang ride vehicle o vehicle row, na nakadaragdag sa limitasyon sa kapasidad ng ride upang bigyang-daan ang puwang sa pagitan ng mga pangkat ng sambahayan, atbp.

TANDAAN: Kapag inaayos ang mga pattern sa paglo-load ng upuan, dapat tiyakin ng operator ng ride na sumusunod ang pagkakakalat ng load na parokyano sa mga pamantayan ng tagagawa sa load/balanse.

- Isakay ang mga miyembro ng sambahayan sa parehong sasakyan kung posible. Ang mga pasahero mula sa iba't ibang sambahayan ay dapat na hindi bababa sa anim na talampakan ang layo. Ang

mga kasapi ng sambahayan ay hindi kailangang maupo nang anim na talampakan ang layo.

- Isaalang-alang ang pag-aalis ng mga linya ng solong-rider dahil kadalasang idinisenyo ang mga ito upang makatulong na punan ang bawat bukas na bakanteng upuan, na malamang na hindi naaayon sa pisikal na pagdistansya.
- Maingat na suriin ang mga atraksyon na nangangailangan ng nakakaubos-ng-oras na personal na paglalagay ng harness tulad ng mga ropes courses, pag-akyat sa dingding, at steel-cable swing rides dahil sa kahirapan sa pamamahala ng pisikal na pagdistansya habang nasa proseso ng paglalagay ng harness. Ang nadagdagan na paglilinis at pagdidisimpekta ng mga harness at iba pang kagamitan sa pagitan ng bawat paggamit ay maaari ring maging mahirap.
- Bilang pangkalahatang patakaran, dapat iwasan ng mga manggagawa ang pisikal na pagtulong/pag-angat sa mga panauhin. Kung nangangailangan ng tulong ang isang panauhin, hingin sa ibang miyembro ng sambahayan na tulungan siya. (Maaaring kailanganin pa rin ng mga manggagawa na pisikal na tulungan/iangat ang mga panauhin kung sakaling kailangang lumikas sa ride.)
- Ang mga manggagawa na nagsasagawa ng mga aktibidad sa pagmementena at pag-iinspeksyon ay dapat na bigyan at gumamit ng hindi tinatagusang guwantes at mga takip sa mukha. Matapos makumpleto ang mga aktibidad sa pag-inspeksyon o pagmementena, ang ride ay dapat na linisin at idisimpektang mabuti bago payagang sumakay ang parokyano.



Karagdagang Mga Pagsasaalang-alang para sa Pagkain at Concession

- Dapat limitahan ng mga operator ang kapasidad sa lahat ng mga nasa loob na establisimiyento ng pagkain at pag-inom sa 25% na kapasidad.
- Pinapayagan ang mga bisita sa parke na kumain at uminom **lamang** sa itinalagang mga kainan. Ang mga concession stand ay dapat na may kasamang karagdagang itinalaga at may-lilim na mga lugar na kainan. Subaybayan at ayusin upang matiyak na may magagamit na mga lugar na kainan na may sapat na distansya.
- Dapat dagdagan ng mga itinalaga at panloob na lugar na kainan ang sirkulasyon ng sariwang hangin sa pamamagitan ng pagbubukas

ng mga bintana o pintuan, kung posible, at alinsunod sa mga protokol sa seguridad at kaligtasan.

- Ipuwesto mga mesa sa loob malapit sa mga bintana at pintuan upang ma-maximize ang palitan ng hangin at bentilasyon ngunit iwasang dumaloy ang hangin mula sa isang partido na nakaupo nang direktang nakaharap sa isa pang partido.
- I-maximize ang distansya sa pagitan ng itinalaga, panloob na mga hapag kainan na lampas sa kinakailangang anim na talampakan, kung saan posible, upang mabawasan ang mga panganib mula sa mga customer na kumakain sa loob nang walang mga takip sa mukha. Isaalang-alang ang paggamit ng mga hindi tinatagusang hadlang sa pagitan ng mga mesa upang maprotektahan ang mga customer mula sa bawat isa at mga manggagawa. Para sa itinalagang mga lugar na kainan sa labas, panatilihin ang mga pamantayan sa pisikal na pagdistansya na hindi bababa sa anim na talampakan at tulad ng nakabalangkas sa gabay na ito.
- Ang lahat ng mga manggagawa sa mga lugar ng kainan at mga concession stand ay dapat madalas na maghugas ng kamay at sundin ang lahat ng kinakailangang mga protokol para sa paghawak at paghahanda ng pagkain. Lahat ng mga tauhan ay dapat na mabigyan at magsuot ng guwantes.
- Madalas na linisin at disimpektahin ang mga host stand at mga lugar ng serbisyo.
- Bigyan ang mga mobile vendor ng guwantes at personal na hand sanitizer. Tiyaking ang mga ibinebentang pagkain at inumin ay nakabalot sa mga selyadong lalagyan. Ipatupad ang mga paraan ng pagbabayad na nakakabawas sa pagpapasahan ng mga card o cash (gumamit ng eksaktong cash, huwag gumamit ng mga system ng pagbabayad na nangangailangan ng lagda, atbp.)
- Maglagay lamang ng nauna nang nakabalot na pagkain sa mga self-service counter. Magdagdag ng mga karatula na nagpapaalala sa mga panauhin na hawakan lamang kung ano ang balak nilang bilhin. Para sa karagdagang kaligtasan at upang mabawasan ang pakikipag-ugnay, isaalang-alang ang pag-alis ng mga nauna nang nakabalot na item at gawin itong available lamang mula sa isang manggagawa.
- Kung ang mga beeper o pager ay ginagamit upang pamahalaan ang mga oras ng paghihintay, disimpektahin ang mga ito sa pagitan ng bawat paggamit. Padalhan ng mensahe ang mga panauhin sa kanilang mga telepono sa halip na gumamit ng mga beeper o pager, kung posible.

- Palitan ang mga magagamit muli na menu ng pang-isang gamit at naitatapong nakasulat sa papel na menu o mga karatula ng menu.
- Ibalot ang mga silverware o plasticware ng paisa-isa sa loob ng napkin para hindi kinukuha ng mga tao ang mga ito mula sa isang grupo ng mga kagamitan sa isang basket, tasa, o kahon.
- Bawasan ang upuan upang suportahan ang pisikal na pagdistansya sa mga lugar na inuupuan.
- Hikayatin ang mga panauhin na mag-order/magbayad ng pagkain at inumin sa pamamagitan ng mga mobile device, hangga't maaari, at gawing available ang mga item para sa counter pick-up. Gumamit ng mga makikitang pananda upang matiyak na mapanatili ng mga panauhin ang pisikal na distansya nang hindi bababa sa anim na talampakan habang naghihintay sa pila. Mag-install ng mga hindi tinatagusang hadlang sa mga quick service restaurant, cart, kiosk at counter ng concession stand, kung maaari.



Karagdagang Mga Pagsasaalang-alang para sa Mga Palabas, Interactive na Exhibit, at Kaganapan

- Limitahan ang mga palabas bawat araw upang may sapat na oras para magpatupad ng mga protokol sa paglilinis at pagdidisimpekta.
- Disimpektahin ang mga mikropono at stand, podium, at iba pang kagamitan sa pagitan ng bawat palabas. Kumonsulta sa mga tagagawa ng kagamitan upang matukoy ang naaangkop na mga hakbang sa pagdi-disinfect, lalo na sa malalambot at buhaghag na ibabaw tulad ng foam earmuffs.
- Hanggang sa naaayon ito sa mga tungkulin ng pasilidad sa mga indibidwal na may mga kapansanan, itigil ang paggamit ng mga kagamitang ipinahihiram sa mga panauhin maliban kung madidisimpekta ito nang mabuti pagkatapos ng bawat paggamit.
- Magpatupad ng sistema ng pagpapareserba upang matiyak na mapanatili ng venue ang kinakailangang mga limitasyon sa kapasidad at masubaybayan ang bilang ng mga dumadalo sa venue, teatro, o lugar ng palabas para matiyak na mapapanatili ang pisikal na pagdistansya. Magtalaga ng mga oras ng pagdating bilang bahagi ng pagpapareserba, kung maaari, upang ang mga panauhin ay darating at papasok sa teatro sa paunti-unting grupo. Kung saan may pila, siguraduhin na magkakalayo ang mga panauhin nang hindi bababa sa anim na talampakan.

- Magtakda ng may-direksyong pagpasok at paglabas sa mga lugar ng palabas kung posible. Dapat na mag-install ang mga operator ng mga divider na Plexiglass sa lahat ng switchback line.
- Payagan ang karagdagang oras para makapasok ang mga panauhin sa mga venue, teatro, at forum upang mapadali ang bagong ayos ng pag-upo.
- Muling ayusin ang magkakalapit na upuan o kung hindi man ay alisin ang mga upuan upang matiyak ang pisikal na pagdistansya nang hindi bababa sa anim na talampakan sa pagitan ng mga panauhin. Maaaring mangailangan ito ng pag-upo sa bawat isa pang hilera o pagharang o pag-alis ng mga upuan sa istilo ng "checkerboard" (gamitin ang bawat hilera ngunit siguraduhin na walang sinuman ang direktang nasa likod ng iba pang mga patron) upang ang mga distansya ay mapapanatili sa lahat ng mga direksyon. Ang mga miyembro ng parehong sambahayan ay maaaring makaupo nang magkakasama ngunit dapat mapanatili ang hindi bababa sa anim na talampakan mula sa ibang mga sambahayan.
- Maglaan ng mga tauhan na tutulong sa tao na mapanatili ang distansya sa panahon ng mga aktibidad. Maaari itong kabilangan ng paghahatid patungo sa mga upuan bago ang pagsisimula ng isang palabas at pagpapaalis sa mga panauhin sa maayos na paraan upang mabawasan ang pagsasalubong ng mga tao. Pamahalaan ang paglabas sa pamamagitan ng pag-anyaya sa mga panauhin na pinakamalapit sa labasan na maunang lumabas.
- Suriin ang mga pamamaraan para sa malapitang pakikipag-ugnayan sa mga costume character o hayop batay sa mga kinakailangang pisikal na pagdistansya at pagsunod sa [Gabay sa Takip sa Mukha ng CDPH](#). Isaalang-alang ang pagkansela ng mga pagkikita-at-pagbabatian pagkatapos ng palabas. Baguhin ang mga oportunidad sa pagpapakuha ng larawan at mga hanay upang mapanatili ang isang minimum na anim na talampakan na distansya sa pagitan ng mga manggagawa at panauhin.
- Para sa mga walk-through na exhibit (museo, aquarium, atbp.):
 - Subaybayan ang kapasidad sa pasukan at venue upang matiyak na mapapanatili ng mga panauhin ang pisikal na pagdistansya sa loob ng espasyo.
 - Isaalang-alang ang paglilimita sa dami ng oras na maaaring manatili ang mga panauhin sa exhibit upang makapasok ang ibang mga panauhin.
 - Isaalang-alang ang pagpapatupad ng isang one-way na daloy ng tao sa exhibit kapag praktikal.

- Madalas na linisin at disimpektahin ang mga madalas na hinahawakang ibabaw at mga viewing window.
- Isaalang-alang ang pagbibigay ng hand sanitizer at/o mga istasyon para sa paghuhugas ng kamay sa buong exhibit.



Karagdagang Mga Pagsasaalang-alang para sa Mga Protokol sa Uniporme, Costume, at Wardrobe

- Sundin ang gabay para sa mga hair salon at barbershop na nasa website ng [Gabay ng industriya upang Bawasan ang Panganib](#).
- Tiyaking ang kagawaran lamang ng costume at wardrobe, kung naaangkop, ang hahawak ng damit at iba pang mga item hanggang sa ang isang costume ay maisukat at maitalaga sa isang manggagawa. Gumawa ng isang proseso upang matiyak na ang costume ng bawat indibidwal na manggagawa ay itinatago nang hiwalay mula sa mga costume at suplay ng iba. Itago ang costume at wardrobe ng bawat manggagawa sa magkahiwalay, may label na mga plastic bag.
- Ang mga manggagawa na humahawak ng maruming linen o labada ay dapat na magsuot ng mga disposable na guwantes na itatapon pagkatapos ng bawat paggamit at dapat maghugas ng kamay kaagad pagkatapos na alisin ang guwantes. Huwag pagpagin ang maruming labada. Mababawasan nito ang posibilidad ng pagkalat ng virus sa hangin.
- Labhan ang mga gamit ayon sa naaangkop alinsunod sa mga tagubilin ng tagagawa. Kung maaari, labhan ang mga gamit ng pinakamainit na setting ng tubig na angkop para sa mga gamit at patuyuing mabuti ang mga gamit.
- Linisin at disimpektahin ang mga basket ng damit ayon sa gabay sa itaas para sa mga ibabaw. Kung maaari, isaalang-alang ang paglalagay ng bag liner na disposable o maaaring labhan.
- Lahat ng manggagawa sa buhok at makeup ay dapat na bigyan ng takip sa mukha at mga naaangkop na kagamitang pamprotekta, kabilang ang mga face shield, goggles ng mata, at mga disposable na guwantes kung saan kinakailangan.
- Dapat magsuot ang mga manggagawa na tumatanggap ng mga serbisyo sa buhok o pagpapapaganda ng mga takip sa mukha anumang oras na hindi ito nakagagambala sa serbisyo, maliban kung exempted ayon sa [Gabay sa Takip sa Mukha ng CDPH](#).

Hinihikayat ang mga takip sa mukha na may mga pansabit sa tainga, kung posible, upang mabawasan ang pagkagambala ng mga serbisyo sa buhok.

- Ang mga workstation ay dapat na regular at madalas na nililinis, kabilang sa pagitan ng bawat paggamit. Linisin at disimpektahin nang mabuti ang mga counter station, mga de-gulong na cart, mga drawer, mga salaming hinahawakan, mga produkto sa pangangalaga sa buhok at iba pang produkto, at mga lalagyan at magbigay ng bagong smock o kapa para sa bawat indibidwal.
- Linising mabuti ang mga extension ng buhok o wig ayon sa mga tagubilin ng tagagawa pagkatapos ng bawat paggamit.
- Bumili ng mga tool at supply para sa paglalagay ng makeup para sa bawat manggagawa at gamitin lamang ang mga ito sa indibidwal na iyon. Itago ang mga supply na ito sa mga indibidwal na bag.
- Paghaluin ang foundation, pulbos, lipstick, at iba pang mga makeup item sa isang disposable palette para sa bawat indibidwal. Gumamit ng mga disposable, pang-isang gamit na applicator para sa bawat tao (hal. mga mascara wand, lip brushes, eyeliner sticks, cotton swabs, powder puffs, atbp.).

1Dapat magsaalang-alang ng mga karagdagang kinakailangan para sa mga taong madaling magkasakit. Dapat sumunod ang mga amusement park sa lahat ng pamantayan ng [Cal/OSHA](#) at dapat handa silang sumunod sa gabay na ito pati na rin sa gabay mula sa [Centers for Disease Control and Prevention \(CDC\)](#) at [California Department of Public Health \(CDPH\)](#). Bukod pa rito, dapat handa ang mga employer sa pagbabago sa kanilang pagpapatakbo habang nagbabago ang mga patnubay na iyon.